

“Kico ta kico.... cu Bienale” a dorna e hal di Biblioteca Nacional renoba



ORANJESTAD- Den hal di Biblioteca Nacional, un exposicion impactante a wordo habri oficialmente pa Minister Michelle Hooyboer-Winklaar den presencia di directora Astrid Britten y un gran cantidad di artista contemporaneo di Aruba, manera Stan Kuiperi, Ciro Abath, Alida Martinez, Osayra Muyale, Irene Peterson, Nelson Gonzlaez, Glenda Heyliger. Sra. Heronimo a representa su yiu Renwick Heronimo pa e ocasion special aki.

HOMENAHE NA ARTISTANAN

ARUBIANO

Como parti di su estudio, e stageiare Annefleur Siebinga di Amsterdam Hulanda, a entrevista diferente artista cu a participa na un Bienale y Ryan Oduber a traha e documentario. E idea di parti di Ministerio a nace pa duna un homenahe na e artistanan Arubiano, den forma di un DVD y un revista, hunto den un solo exposicion y pone esaki na Biblioteca Nacional completamente renoba. Y esaki Annefleur Siebinga hunto cu Ryan Oduber, Zahira Zaandam y Joost Horward a realisa. E topico “Kico ta kico.... cu arte Bienale” a wordo trata den un forma diferente. Un breve historia, entrevistanan cu un seleccion di artista local, un bista riba e artistanan chikito cu a participa na e Arte Mobile den vakantie, un introduccion di e estudio profesional di arte y cultura aki na Aruba mes, Gerrit Rietveld Akademie ta locual por mira. E proceso no tabata facil at all! E artistanan tabata hopi ocupa cu Prome Encuentro Bienale, otro artistanan no a mira e necesidad di wordo honra, otro artistanan ta bibando den exterior y mirando e tempo disponibel a



scoge pa entrevista esnan cu ta aki y cu ta muestra nan disponibilidad.

ARTE CONTEMPORANEO DI ARUBA

Un total di 17 artista local a yega di participa na un Bienale, representando Aruba, cuminsando cu Wouter van Romondt. E hecho aki ta demostra cu mundo di arte, arte

contemporaneo na Aruba tin un pasado interesante y un futuro hopi prometedor su dilanti. Esey e Prome Encuentro cu Bienale a demostra. A papia tambe tocante e intencion pa sigui cu “Kico ta kico cu arte...” “tratando diferente topico na manera diferente. E magazine Kico ta Kico cu Arte...Bienale lo wordo parti gratis na Biblioteca Nacional, specialmente pa e hobennan

di school avansa. Lo pone un exposicion similar na Biblioteca na San Nicolaas tambe. Minister Michelle Hooyboer-Winklaar a yama tur e artistanan y tur esnan envolvi den e proyecto pabien cu e logro aki. Un danki na e sponsornan cu a coopera pa ‘Kico ta Kico cu arte...’ mira luz di dia. Riba combinacion di potretnan por aprecia mas di e actividad aki na Biblioteca. □